

Канон Вифлеемским младенцам

Песнь 1.

Ирмос: Пределив пучину чермную Бог, / фараона погрузивый в ней, / провед Моисея немокренно в пустыню / и одождив манну в снедь людем Израилевым, / яко силен.

1. Звезда воссия в Вифлееме / и Едема от мрачных разреши клятвы, / и спасения день даруется родоначальником, / из девственна облака просиявый Иисус, / сущих во тьме просвещение.
2. Тризнице днесь младенцев отверзеса верным за Христа и Бога, / врагов обличая начала и власти / и Иродов обличая мужески младоумный гнев смысленно.

Слава Отцу и Сыну и Святому Духу, и ныне и присно и во веки веков. Аминь.

Богородичен: Божественное утверждение и стена нерушима, Чистая, / и мысленный мост присно, / и необоримь столп, и основание, и покров, / егоже ради спасаемся вси от бед, / Ты еси воистинну.

Песнь 3.

Ирмос: Утверждай гром и созидай дух, / утверди мене, Господи, / да Тя пою истинно / и творю волю Твою, / яко несть свят, яко Ты, Боже наш.

1. Девственною дверию прошед, Содетель и Бог наш / плотский дом Себе созда неизглаголанно, и Младенец бысть, / и во яслех восклонися.
2. Сверстницы дети - страдальцы Христова воплощения, / Иродово неразумное ослепиша неистовство / и очи всесветлии Церкви явишася.

Слава Отцу и Сыну и Святому Духу, и ныне и присно и во веки веков. Аминь.

Богородичен: Из Тебе безотчий явися, безматерен прежде веков Господь, / и зиждется преестественно, и наздание дарует сущим из Адама обожения, Дево Неискусобрачная.

Кондак младенцев, глас 6. Подобен: Еже о нас:

В Вифлееме рождшуся Царю, волсви от Персиды с дары приходят, / звездою свыше наставляеми, / но Ирод смущается и пожинает младенцы, яко пшеницу, / и рыдает себе, / яко держава его вскоре разорится.

Седален младенцев, глас 4. Подобен: Явился еси:

Рождшемуся днесь от Девы младенцев воинство / яко Творцу и Царю приятная приносятся заколения, / предложенная Христу веры ради.

Слава и ныне, глас 4. Подобен: Удивися Иосиф:

Удивися, уведев, Ирод, царь лютый, / ища яростию, противу боря рождшемуся на земли Царю, юному Христу, / и, боязнию и страхом многим содержимь, / посылает воинство убити с яростию дети, в Вифлееме младенствующия, купно с ни и

покушаяся Создателя, за благоутробие обнищавшаго: / из девственных бо утробы произыде, спасти хотя род наш.

Песнь 4.

Ирмос: Услышах слух Твой и убояхся, пророк глаголаше, / разумех дела Твоя, и удивихся, и возопих: / слава силе Твоей, Господи.

1. Дева и Небо, Небесныя и земныя, / Рождеством ходатайствовавши, паче ума примири / и вражды средостение разори.

2. Младенец множество мученически, по Бозе всех пострадавше, почести страдания от Него приемлет: / ихже ради Ирод весьма устыдеса.

Слава Отцу и Сыну и Святому Духу, и ныне и присно и во веки веков. Аминь.

Богородичен: Божественное Слово во утробе заченши, страшным Словом / паче слова породила еси плотию, Всенепорочная. / Темже Тя, Богородицу, славим.

Песнь 5.

Ирмос: Возсияй ми, Господи, свет повелений Твоих, / яко к Тебе дух мой утренюет и поет Тя: / Ты бо еси Бог наш, / и к Тебе прибегаю, Царю мира.

1. Чувственное убо солнце облаки покрывается, / Умное же и Всеневещественное, безмерным благоутробием в плоть одеаяся, / в вертепе днесь пеленами повивается нас ради.

2. Скверноубийства кровью Ирод оскверняется: / Владыку бо всех, Бога и Царя, убити покушаяся, / на отроки неистовствует и свирепствует люте.

Слава Отцу и Сыну и Святому Духу, и ныне и присно и во веки веков. Аминь.

Богородичен: Зарю молитвы Твоя, Богородительнице Чистая, / слепоту сердца моего озари, / яко едина светильника Господа /и славы солнце возсиявши Христа.

Песнь 6.

Ирмос: Буря мя многих согрешений моих потопляет, / и изнемогает дух мой; / но Ты, Господи, / яко милостив, сиед, / возведи живот мой.

1. Божественное воплощения Слова совершается днесь таинство, / Богородице: Тобою бо явися плотию Бог Превечный, / да обожит приятие.

2. Рахиль, убо чад плачуши, / древле провозвести за Христа младенцев, приемших безгодное заколение; / тем и отрицашеся, утешитися не хотящи.

Слава Отцу и Сыну и Святому Духу, и ныне и присно и во веки веков. Аминь.
Богородичен: Божественное Рождество Твое, Всесвятая, / прозябшую пресече в раи клятву / и, стезю древа жизни человеком отверзши, / благословение источи.

Кондак, глас 4. Подобен: Явился еси:

Звезда волхвы посла к Рождшемуся, / и Ирод неправедное воинство посла люто, / убити мя во яслех / яко Младенца лежаща.

Икос:

Горним и дольным, ныне вкупе веселящимся / во явлении всех Царя, / Ирод сам токмо с пророкоубийцы иудеи соболезнует: лепо бо самым им токмо рыдати, / не бо от ныне царствовати имут; / но царство Господне и еще державствовати имать, / дерзости врагов отражающее / и множества верных созывающее / с честными младенцы взирати / Иже во яслех яко Младенца лежаща.

Песнь 7.

Ирмос: В пеци авраамстии отроцы персидстии, / любовью благочестия паче, / нежели пламенем, опаляеми, взываху: / благословен еси в храме славы Твоея, Господи.

1. Веселится днесь Вифлеем с нами, / Тя бо, Невместимаго, в вертепе приемлет, / благословен еси, - вопия, - един Бог отец наших. Незлобива жертва и нескверная за тя предзакалается, Божий Слове, вопиющи: / благословен еси, Господи, Боже отец наших.

Слава Отцу и Сыну и Святому Духу, и ныне и присно и во веки веков. Аминь.
Богородичен: Радуйся, небурное покаяния пристанище, / в неже прибегающе, Богородице, зовем: / благословена еси Едина, рождшая Бога отец наших.

Песнь 8.

Ирмос: Всяческая, Владыко, премудростию Твоею составил еси, / земли же паки утвердил еси, якоже веси, дно, / основанием водрузивый на водах безмерных. / Тем вси вопием, воспевающе: / благословите, дела Господня, непрестанно Господа.

1. Ангели славят власть Рождшагося, / пастырие чудятся, и волсви покланяются, / Небеса возвещают звездою Зиждителя; / с нимиже вси, воспевающе, вопием: / благословите, дела Господня, Господа.

2. Множество неискусозлобное воинствует Владыце днесь кровию / и на Ирода твердо вооружается, Тебе, Христе, рождшуся. / Тем вси вопием, воспевающе: / благословите, дела Господня, Господа.

Слава Отцу и Сыну и Святому Духу, и ныне и присно и во веки веков. Аминь.
Богородичен: Деву Тя, Чистая, храм, и дверь, и облак, / купину неопалиму, и стамну манны, и жезл прозябший, / кивот, и свещник, и скрижали Завета, / гору

святую, из неяже камень отсечеса, / пророцы Божии проповедаша.

Песнь 9.

Ирмос: Яко сотвори мне величия Сильный, и свято Имя Его, / и милость Его / в род и род боящимся Его.

1. Весь в Тебе вмещается, / Иже в недрах сый Отца, / и зиждется Зиждитель небесе, / и истощается мене ради, / и, в пеленах повився, разрешает прегрешений пленицы.

2. В Раме слышася Рахили горькое рыдание, / плач же, и увы, и сокрушение; / скверноубийца бо враг, на чада Вифлеемская, Ирод пока зася.

Слава Отцу и Сыну и Святому Духу, и ныне и присно и во веки веков. Аминь.

Богородичен: Рождеством Твоим, Дево, обожихомся, смертнии: / Бога бо, Питателя всех и единославна Отцу, / и раждаеши, и млеко питаеши. / О, страннаго чудесе!

Светилен. Подобен: Крест хранитель:

Злачную ниву младенец, богоборствуя Ирод, / послав, незрелую пожа, окаянный, / и, рождшагося Господа не возмог убити, / всякаго срама исполняется.

МОЛИТВА СВЯТЫМ МУЧЕНИКАМ МЛАДЕНЦАМ ВИФЛЕЕМСКИМ

О Святи мученицы, младенцы Вифлеемстии, от Ирода за Христа нещадно убиеннии! Вы душами вашими на Небеси Престолу Божию предстоите и триипостасныя Его славы наслаждаетесь, телесы же святыми на земли в Божественных храмах почиваете и данную вам свыше благодатию различная чудеса источаете, призрите милостивными вашими очесы на предстоящи люди, пред честною вашею иконою умильно молящихся и просящих от вас целебныя помощи и заступления: прострите ко Господу Богу нашему теплыя ваша молитвы и испросите душам нашим оставление согрешений. Се бо мы, за беззакония наша не смеющее возвести очеса наша к высоте небесней, ниже вознести глас молебный к Его в Божестве неприступней славе, сердцем сокрушенным и духом смиренным вас, ходатаев милостивых ко Владыце и молитвенников за ны, грешныя, призываем, яко вы прияли есте благодать от Него недуги отгоняти и страсти исцеляти. Вас убо просим: молитесь о всех непраздных (имя рек), во чреве имущих, и о чадах их, во еже увидети им свет чувственный, да и умного света, еже во святем крещении, сподобятся; не презрите нас, недостойных, молящихся вам и вашей помощи требующих. Будете нам в печалех утешителие, в недузех лютых страждущим врачеве, напастуемым скорые покровителие, очесем недугующим прозрения датели, ссуци и младенцем в скорбех готовейшии предстатели и исцелители; исходатайствуйте всем вся, яже ко спасению полезная, яко да вашими ко Господу Богу молитвами получившее благодать и милость, прославим всех благих Источника и Дароподателя Бога, Единого в Троице Святей славимаго Отца и Сына и Святаго Духа ныне и присно и во веки веков. Аминь.